



REPUBLIKA E SHQIPËRISË
AUTORITETI I KONKURENCËS
KOMISIONI KONKURENCËS

VENDIM

Nr. 887, Datë 10. 06 . 2022

“ MBI AUTORIZIMIN E PËRQENDRIMIT TË REALIZUAR NËPËRMJET PËRFTIMIT TË KONTROLLIT TË SHOQËRISË BANCA COMERCIALË “ENERGBANK” S.A. NGA SHOQËRIA AS IUTECREDIT EUROPE”

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Adriana BERBERI	Anëtar
Znj.	Rezana KONOMI	Anëtar

Në mbledhjen e tij të datës 10. 06. 2022, shqyrtoi çështjen me:

Objekti: Autorizimi i përqendrimit të realizuar nëpërmjet përfthimit të kontrollit të shoqërisë Banca Comercialë “ENERGBANK” S.A. nga shoqëria AS IuteCredit Europe.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve, mbi njoftimin e përqendrimit të realizuar nëpërmjet përfthimit të kontrollit të shoqërisë Banca Comercialë “ENERGBANK” S.A. nga shoqëria AS IuteCredit Europe.

VËREN SE :

I. Palët në transaksion dhe procedura

Pranë Autoritetit të Konkurrencës është depozituar njoftimi mbi disa blerjeve të njëpasnjëshme të aksioneve të shoqërisë Banca Comercialë “ENERGBANK” S.A. në bursën Moldave, nga shoqëria AS IuteCredit Europe.

Referuar dokumenteve që vërtetojnë marrjen e kontrollit mbi shoqërinë e synuar Banca Comercialë “ENERGBANK” S.A. nga shoqëria AS IuteCredit Europe (vërtetime të lëshuara nga

agjenti i blerësit në bursën Moldave), palët janë:

Pala blerëse: AS IuteCredit Europe është një shoqëri holding e grupit të shoqërive IuteCredit i cili ofron kredi konsumatore dhe shërbime personale financimi nëpërmjet shoqërive të kontrolluara 100% nga grupi në Moldavi, Shqipëri, Maqedoninë e Veriut, Bullgari, Bosnje dhe Hercegovinë. AS IuteCredit Europe është përgjegjëse për menaxhimin strategjik të Grupit IuteCredit.

Shoqëritë e kontrolluara brenda grupit zbatojnë proceset e përcaktuara nga AS IuteCredit Europe dhe u ofrojnë shërbime konsumatorëve.

AS IuteCredit Europe është prezente në Shqipëri nëpërmjet dy shoqërive të kontrolluara prej saj: IuteCredit Albania SHA dhe Velox Pay SHPK.

IuteCredit Albania SHA është një institucion financiar mikrokredie, ndërsa Velox Pay SHPK është licencuar nga Banka e Shqipërisë si institucion i parasë elektronike, por ende nuk kryen asnjë aktivitet tregtar.

Pala shitëse: Aksionarët që shesin aksionet e shoqërisë Banca Comercială “ENERGBANK” S.A. ndahen në disa grupe: Grupi i aksioneve të thesarit; grupi i aksioneve ankand; grupi i aksioneve të bllokuara; entitete ligjore dhe persona fizikë.

Target: Banca Comercială “ENERGBANK” S.A. / B.C “ENERGBANK” S.A. është një shoqëri aksionare, e themeluar në përputhje me legjislacionin e Moldavisë dhe aktive në tregun financiar, e cila ofron shërbime bankare për konsumatorët dhe për shoqëritë tregtare si: shërbime kredie, këmbim valutor, online-banking dhe pagesa me karta bankare etj.

B.C “ENERGBANK” S.A. nuk është prezente dhe nuk realizon të ardhura në Shqipëri.

Përqendrimi

Më datë 16 korrik 2021, shoqëria AS IuteCredit Europe depozitoi zyrtarisht pranë Bankës Qendrore Moldave një kërkesë për të blerë 100% të kapitalit të shoqërisë B.C “ENERGBANK” S.A. Më datë 30 dhjetor 2021, Banka Qendrore Moldave autorizoi shoqërinë AS IuteCredit Europe për të blerë deri në 100% të kapitalit aksionar të shoqërisë B.C “ENERGBANK” S.A.

Duke filluar nga data 10 janar 2022 e në vazhdim, AS IuteCredit Europe ka kryer disa blerje të njëpasnjëshme të aksioneve të shoqërisë B.C “ENERGBANK” S.A. në bursën Moldave. Më datë 19 prill 2022, AS IuteCredit Europe zotëronte në total 1 891 681 aksione, që përbëjnë 94.58% të kapitalit aksionar të shoqërisë B.C “ENERGBANK” S.A. Pjesa tjetër e aksioneve do të zotërohet nga Balcolcolm S.A dhe nga personat fizikë.

Referuar marrëveshjeve si dhe pasqyrave financiare të palëve, transaksioni i propozuar, përben një përqendrim në kuptim të nenit 10 dhe 12 të ligjit nr. 9121 datë 28.07.2003 “Për mbrojtjen e konkurrencës” dhe si i tillë është objekt autorizimi nga Komisioni i Konkurrencës.

II. Vlerësimi i konkurrencës

Referuar nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, si edhe Udhëzimit nr.76, datë 07.04.2008 “Për përcaktimin e tregut përkatës”, treg përkatës do të konsiderohet tregu i shërbimeve bankare, por duke qenë se transaksioni mund të mos ketë ndikim në tregun shqiptar si edhe duke iu referuar praktikave të Komisionit Evropian në çështje të

ngjashme, tregu përkatës i produktit do të lihet i hapur. Treg përkatës gjeografik do të konsiderohet territori i Republikës së Shqipërisë.

Transaksioni i njoftuar është përfundim i kontrollit të shoqërisë Banca Comercială “ENERGBANK” S.A. nga shoqëria AS IuteCredit Europe.

AS IuteCredit Europe është një shoqëri holding e grupit të shoqërive IuteCredit, i cili është prezente në Shqipëri nëpërmjet shoqërive të kontrolluara prej saj: IuteCredit Albania SHA dhe Velox Pay SHPK. IuteCredit Albania SHA është një institucion financiar mikrokredie, ndërsa Velox Pay Shpk është licencuar nga Banka e Shqipërisë si institucion i parasë elektronike, por ende nuk kryen asnjë aktivitet tregtar.

Banca Comerciala “ENERGBANK” SA është një bankë tregtare, e cila nuk është prezente dhe nuk realizon të ardhura në Shqipëri.

Përqendrimi nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë ndryshim dhe nuk do të ketë ndikim në tregun shqiptar.

PËR KËTO ARSYE:

Komisioni i Konkurrencës, në bazë të nenit 24, germa d) dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”,

VENDOSI:

1. Të autorizojë përqendrimin e realizuar nëpërmjet përfundimit të kontrollit të shoqërisë Banca Comercială “ENERGBANK” S.A. nga shoqëria AS IuteCredit Europe.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS